

B. C. D.

DISPUTATIO MEDICA  
INAUGURALIS

*De*

ALVI CONSTI-  
PATIONE,

*Quam*

SUMMO DUCE ARCHIATRO

*Authoritate & Decreto Gratiſſæ*

*Facultatis Medicæ in Alma Tubingensi,*

P R Æ S I D E

MAGNIFICO UNIVERSITATIS *h. t.* RECTORE

DN. GEORG-BALTHASARE

METZGERO, Med.D. & P.P.

Patrono ac Præceptore ſuo æternùm devenerando.

Pro Licentia

*Summos in Arte Medica Honores, Inſignia atq̃*

*Privilegia Doct̃oralia, legitimè conſequendi,*

Publico Eruditorum Examine ſiſtit

IN AULA NOVA

*Ad diem Auguſti,*

JOHANNES SIGFRIDUS Müller /

Neolitho-Hoenloicus.

T U B I N G Æ,

Typis JOHANN-HENRICI REISI,

ANNO M DC LXXVIII.

V I R O

*Admodum Reverendo, Dignissimo  
atque Excellentissimo,*

DN. CHRISTOPHORO WÖLFFLINO,  
SS. Theologiæ Doctori famigeratissimo, Sere-  
niss. Würtemb. Duci à Concionibus Aulicis & Confessio-  
nibus sacris, Ducalis Consistorii Assessori, nec non Lau-  
reacensium Præsuli gravissimo, Cognato suo atque  
primo studiorum suorum Promotori loco Paren-  
tis piè, sanctèque æternùm  
colendo,

U T E T

Germano suo charissimo

V I R O

*Nobili, Praclarissimo,*

DN. HENRICO JACOBO MÜLLERO,  
Serenissimo Württembergiæ Duci à Consiliis  
Redituum & Rationum Cameralium  
fidelissimo,

PRO. COLLATIS. HACTENUS. BENEFICIIS.

IN. MENTIS. GRATIÆ. SYMBOLUM.

UTQUE. BENE. DE. SE. MERERI. PERGANT.

Dissertationem hanc inauguralem


*Dat. dicat. consecrat.*

Obsequiosissimus Cliens,

*Fidelissimus Frater*

JOHANNES SIGFRIDUS Müller.





B. C. D.



Rita in *Medicorum* Schola vox est: *Qui bene ingerit, bene digerit, bene egerit, sanus est.* Ratio è longo petenda non venit; cùm enim omne animal, quamdiu sal-  
vum fuerit, nutritione indigeat; hæc autem, nisi extrinsecus advocatô & in-

gestô alimentô, nisi hõc bene digestô inque succum & sanguinem conversô, fieri nequeat, quis non videt, à bona ingestione, parique digestionem præcipuum valetudinis punctum dependere. Nec minoris felix egestio momenti est: Quantum enim sanis pariter ac morbo-  
sis vel sola immorigera alvus, ut alias egestionis vias nunc modosq; taceam, cùm suum non faciat officium, negotii sæpe facessat, præter quotidianam experien-  
tiam ipse *Cous* noster testatum reliquit, ventris, inqui-  
ens, torpor omnium conturbationem & vasorum im-  
puritatem affert, *6. epid. s. 3. t. 1.* Unde, ut in foeminis, quod ex ore *Scherbij Casp. Hoffmannus* monet, semper est quærendum de mensibus, in pueris de lumbricis, *l. 1. de loc. aff. c. 8.* ita secundum *Hippocratem* sub primo sta-  
tim accessu inter alia ægrum interrogare oportet, an alvus secedat *l. de affection.* pro vita enim longa nihil u-  
tilius, quàm quotidiana alvi excretio, nihil incommo-  
dus & deterius, quàm nîsum expultricum facultatum, ani & vesicæ, negligere, verbis *Franc. Oswaldi Grembsii* *arb. integr. & ruin. hom. l. 3. c. 2. par. 77. 78.* Rei itaque di-  
gni-



gnitate, vel potiùs necessitate, persuasus, locò *Inauguralis Thématis*, Symptoma communissimum, agro & Medico molestum, **Alvi Constipationem** sub examinis incudem vocabo, hujus naturam, causas, signa & curationem plenius exploraturus. Deus successum secundet.

## THESIS I.

**A**lvi igitur constipatio, adstrictio, obstructio, detentio, lurities (his enim & similibus nominibus insignitur *Affectus praesens*) quid sibi ratione nominis velit, in vulgus jam notum est; τῆς κριλίας σύγρωσις *Dioscoridi*, ξηρότης *Hippocrati* audit. Qua rem; *Est naturalis excrementorum alvinorum defectionis defectus ab expultricis Intestinorum frustratione ortus.*

II. *Defectum* dum assero, *naturalis defectionis*, symptoma actionis laesae indigito, hujusque vel abolitae penitus, si planè nulla fit excretio, vel imminutae, si aliqua, valetudini tamen bonae conservandae non sufficiens, materiae excernendae non correspondens, quarum hinc nulla excluditur; peccatur utrinque, luereque peccatum hoc totum subinde corpus, & partes omnes coguntur, ut infra constabit. Addo *alvinorum excrementorum*; ut caetera seponam, quae hujus loci & viarum harum non sunt, in oeconomia tamen humana naturaliter & quotidie generantur: Ut enim impossibile est, fabrum scriniarium operari sine scobibus; ita impossibile, ullam fieri in corpore coctionem sine excrementis, verbis praecit. *Hoffmanni*. Omnium tamen evidentissime prima coctio, quae in ventriculo & intestinis fit & absolvitur, sordes ex necessitate materiae colligit, easque cum aliis aliunde confluentibus, cum in alios natura usus convertere nesciat, si bene sibi consultum vult, in tempore, debitam copiam viaeque, ejicit; secus ubi accidit, symptoma hoc nostrum nascitur, & cum eo mali omnino lerna.

III. *Subjectum Intestina* voco, locum ubi naturaliter crassiores alimentorum feces colliguntur, excrementitii humores aliunde confluant, & suo excernenda tempore stabulantur. Statim autem  
quaestio

quæstio nascitur; an totum corpus hoc tubulatum, quod intesti-  
 norum communiter nomine venit, à pyloro ad sedem usque pro-  
 tractum, subjectum agnosci debeat? *Riolanus* omnibus hoc inte-  
 stinis commune symptoma facit: quod verum, si tam transmit-  
 tentes quàm excipientes viæ considerentur, secundùm *Theodor.*  
*Schenckium Exerc. Anat. 5. l. 1. sect. 2. c. 18.* omnibus data est in-  
 terna tunica movens, omnibus motus peristalticus datus, quod  
 ex *Franc. Glissonio de ventriculo & intestinis* mox planius patebit;  
 Imò jam nominatus *Cass. Hoffmannus de loc. aff. l. c.* etiam super-  
 addit ventriculum qui malè dispositus egestionem quoque impe-  
 dit. In specie duodenum instrumentum obstructionis fieri nemo  
 inficiabitur, qui situm ejus sub pancreate cognitum habet, quò  
 induratò & compressò subtus duodenò, ut nausea non rarò &  
 vomitiones sequuntur, ad exemplum à *Dominico Panarolo* nota-  
 tum *pentecost. 1. obs. 44.* ita etiam alvi obstructiones de facili o-  
 riuntur. Obstructum hoc à lapidibus nucis moschatæ magnitu-  
 dine & plumbeò colore visum à *Trafelmanno* recenset *Th. Bartho-*  
*linus in instit. Anat.* stercore refertum durissimò prædictus *Pana-*  
*rolus pent. 3. jatrolog. obs. 29.* conspexit. Nec de jejuno aliter  
 cogitandum pari ex parte cum priori situ gaudente. *Modernorum*  
 qui delectantur placitis, asserti inde hujus felix subsidium accersere  
 possunt; dum enim succi hi biliosi, pancreatici & salivalis conflu-  
 xum hîc fieri, in alvinarum præprimis sordium, per novam hinc  
 ortam effervescentiam, sequestrationem, credunt, quis non ani-  
 madvertit, non factâ feliciter sequestratione hâc, inter alia, sym-  
 ptomati & huic amplas hîc fenestras foresq; aperiri? Consulân-  
 tur *Francisc. de le Boe Sylvius in Idea Medic. præct. Bernhard.*  
*Swalve pancr. pancr. &*, qui cum his faciunt, plures. Ileum,  
 stercoreum primum elaboratorium & stabulum, secundum *Glisso-*  
*nium l. c. c. 24.* adeò hîc absolvi non potest, ut, quibus non suffi-  
 ciunt variæ remorandis p. n. excrementis convolutiones, suas vel  
 ipsum, quas confert hîc, vires in iliaco malo satis superque præ-  
 bet, dum alvo occlusâ per superiora scybala alvina redire jubet,  
 in hernia intestinali prolapsum, alvum ad gangrænam, imò mor-  
 tem usquè supprimit. Cæcum quidem, coli appendicula, quod  
 potissimis extra uterum usu destitutum, nec singularia ad Medi-



cinam facientia suppeditare creditur, an culpā aliquā teneatur, in medio relinquo; communes cum cæteris intestinis affectiones habere *Schenckius*, l. c. largitur, multaque hîc asservari non per dies tantum sed per menses *Andr. Laurentius* asserit, indeque devoratos ceraforum nucleos post quantum demum mensem rejets scribit l. 6. *Anat. c. 14. Job. Fernelius* crassiores hîc pituitam diutius coerceri, nonnunquam in calculos concrefcere autumat 6. de part. morb. & sympt. c. 9. mortem ipsam miram alvi adstrictionem sequutam fecibus in cæco coacervatis, *Marcellus Donatus. Hist. Med. mirab. l. 4. c. 10.* notavit, ut ideò non sine ratione hoc suspectum *Tb. Bartholinus* habeat c. 3. epist. Med. 70. cent. 4. epist. 92. In colo verò præcipuè colligi alvinas feces, experientia, dolor ab inflatione & distensione natus, sexcenta alia, abundè comprobant. Intestinorum omnium amplissimum hoc est, ut primæ coctionis excrementis recipiendis, & ad necessitatem supprimendis par sit, situm musculis abdominis contiguum accepit, ut horum compressionem in egerendis fecibus primum sentiat, propellatque in rectum, unde laxatis post fibris sphincteris annularibus rectò efferantur, Naturæque voto satisfiat: contrà, si contrà sit.

IV. *Causam immediatam*, ad commune placitum, dixi, *frustratam intestinorum expultricem*. Frustratur autem hæc vel expellendæ materiæ, vel intestinorum ipsorum, causarum mediatarum proximarum, culpā; Materia expellenda præcipuè quidem assumptorum & in ventriculo & intestinis contentorum moli ascribitur, ad cujus etiam copiam aut inopiam, nec non qualitates varias, expultricis exercitium sese habet: Contribuunt tamen symbolum etiam suam partes secretioni dicatæ aliæ, quæ sua pariter secreta in communem hunc intestinorum ductum deponunt, & quidem, si *Glissonius* l. c. c. 24. calculum rectè posuit, duplò circiter plus, ut excernantur. Hæc, quæ, qualia, quanta sint, ad mentem suam *Cass. Hoffmannus* explicat, l. c. c. 2. verius ea *Glissonius* determinasse videtur l. c. c. 24. §. 6. quibus *Thomas Willisius* ex hypothesi sua liquorem ex nervearum fibrarum extremitatibus extillantem associat *pharmac. ration. s. 6. c. 6.* culpamque merentur vel quantitate eaque vel excedente, si iustò



copiosiora viam sibi ipsis intercludant, secundum *Hieron. Capitulum. l. 3. pr. Med. c. 13.* vel deficiente, si pauciora vel nulla sint, quæ expultricem non satis vel planè non sollicitant; qua de posteriori tamen causa an rectè hic recenseatur, non immeritò cum *Paulo Ammanno in paren. ad Instit. l. 2. sect. 3. c. 6.* dubito; quò enim modò, quod non est, accusare, aut alvum constipare potest? Non entis nullæ sunt actiones. Vel qualitate, si calida nimis & sicca, dura minusque mobilia descensum præpediunt; si viscida, tenacius adhærentia, propulsioni pertinaciter resistunt, si vi stimulante quacunque careant. Intestinorum culpa varia occurrit, quatenus præsentis objecti ingrati perceptione non gaudent, vi motivâ destituuntur, vias non satis liberas, non rectè dispositas offerunt. In perceptione objecti vel quantitate vel qualitate molesti principaliter expultricis facultatis fundamentum consistit; expellit enim non nisi quod molestum, quod displicet, unde naturali sensu quodam displicentiæ hujus intestina opus habent, qui si abest, nec intestina ad moliendam excretionem irritantur. Dein motus intestinorum naturalis, quò expulsio perficitur, requiritur; non enim excrementa seipsa movent, sed ope & contractione fibrarum suarum motum intestina naturalem, testudineum ferè, peristalticum dictum, patiuntur, quò à parte ad partem sensim sensimque excrementa propelluntur & ad alvum usque protruduntur; qui si diminutè exercetur, miri nihil alit, si illa etiam diminutè excernuntur. Motus hujus in intestinis adhuc calentibus in abdomine recens aperto, nec non extra abdomen per vulnerationem effusis, manifesta ad oculum vestigia notare licet. Naturali motui huic voluntarius alius in subsidium venit, quò reclusò ani sphinctere musculisque abdominis compressis excrementa rejiciuntur; hoc læsò expulsio itidem vacillat. Denique viæ liberæ, cavæ, lubricæ desiderantur, per quas materia exportatur, quæ vel per congenitum vitium vel adscititium transitum materiæ denegant, de quibus omnibus & singulis jam circa causas mediatas remotas plenius.

V. Harum primæ sunt ex *naturalium rerum* ordine petitæ, temperamentum calidum & siccum, quod alvi naturâ siccioris non rarò author est; frigidum & siccum, v. gr. Senum, quibus



ideò præ aliis ætatibus siccam habere alvum magis convenit apud *Hippocratem de affection.* habitus calidior corporis, cutis raritas 6. *epid.* s. 3. t. 1. quæ multam humiditatem transmittit. Inter anni tempora hyems aquilonia malè audit 3. *apt.* s. & 11. 12. *comment.* exiccat enim & refrigerat; quæ s. xum virilis, ceu calidior & siccior, præ muliebri citius hæc tentatur; quæ vitæ genus gravidæ magis quàm aliæ huic expositæ infortunio sunt; uterus enim tumidus feces compressis intestinis supprimit. *Gottofredus Mæbius.* dispositionem etiam hæreditariam ad tribunal citat, l. 2. par. 2. c. 6. contagiò à parentibus cum semine & lacte uterino in sobolem transfusò. Naturalis intestinorum angustia in nonnullis obstaculo esse potest.

V.I. Ex non naturalibus operam suam pollicetur *Aër*, cuius ambientis cum qualitatibus corporis nostri humoribus quasi necessaria intercedit analogia, isque potissimùm frigidus, qui quæ in ventre sunt, indurat ex 6. *Epide.* s. 7. t. 26. adde *comm. Gal.* s. t. 27. calidius, æstivus & fornacis *Capivaccio l.c.* suspectus. Ventus aquilo *lib. de humor.* & 3. *aphor.* s. eòdem nomine incusatur. Conspirant cibi notatis jam antè vitiis & qualitatibus imprægnati, copiâ excedentes, calefacientes, nimis exiccantes, aromatici, crassi, viscidi, digestu difficiles, vel flatulentia divites, unde coctioni, secretioni & excretioni negotium faciunt, motum ad alvum impediunt, materiam suspendunt; austeri, acidi, stiptici & adstringentes, primâ præsertim mensâ sumpti & jejuno ventriculò, secundùm communem, (qua de tamen *Gvern. Rolfincius meth. Med. spec. comment.* l. 2. s. 3. c. 58. *Bernhard. Svalve querel. & opprobr. ventric.* censura observatu digna est) corrugant internam cavitatem & consequenter lubricitatem necessariam pervertunt. Hos inter panis ὁ πᾶνν aliàs, cùm nihil huic deest, primas habet, quantitate ventriculum nimium gravans, ex officina sua recens calensque, ob ætatem mucidus, bis coctus, nauticus, minus fermentatus, plumbeus, adde *Kergerum de ferment.* 53. c. 2. Juvant boum aratorum & vetularum vaccarum carnes, aliæ succi crassi feraces, fumò induratæ, pisa, lentes, fabæ, caseus, 4. *de vict. rat. in acut.* Non sine ratione farinam crudam *Fabrit. Hildanus c. 6. obs. 34.* & *Mich. Ettmüllerus in valetud. infantil.* c. 2. §. 16.



2. §. 16. cum lacte vel aqua subactam & in pulmentum instar viscosi glutinis redactam in infantibus detestantur, bibliopegis pro glutinandis chartis utiliore, quam pro nutritione, quorum ille inde periculosissimam pylori obstructionem natam scribit *l. c.* Inter stiptica & adstringentia veniunt cydonia, pyra, poma austera, mespila, sorba immatura, castaneæ præsertim crudæ: alimenta delicata, paucis scoriis excrementitiis prædita; nec non inediam ad alvi etiam stipticitatem facere communis doctrina est, de quibus *Thes. 4.* jam dixi. Paria cum cibis potus pollicetur, vel nullus, vel debitò parcior sumptus, unde nec chylus, nec feces diluuntur latis, vel jam damnatis præditus viribus alius. Frequenti calidarum sulphurearumque aquarum usu non nemo, exsiccatas fibris corrugatisque intestinis, nec non motu peristalticò impeditò, obstinatum expertus fuit alvum apud *Tb. Bartholinum cent. 4. Histor. Anat. 40.* Acidulæ multò spiritu acidò ditatæ idem minantur. Spiritum vitrioli sincerum & similia *Glissonius* huc trahit, quod pylorum nimis coarctando strangulant, ut hinc nihil è ventriculo exeat, *l. c. c. 24.* ab usu decocti columbi cum fassa fr. arefacta concidisse intestina *Job. Rhodius c. 1. obs. Med. 87.* testatur; ab essentia roris-marini familiariter sumta, humidò ventriculi absumptò, *Panarolus* in patre quodam Cappucino exiccata stercora suspicatur, *pentecost. 3. obs. 29.* idemque à calidis medicamentis aliis contigisse *Marcellus Donatus Hist. l. 4. c. 10.* refert; conspirare cum cibis & potu adstringentibus medicamenta adstringentia experientia quotidiana testis est. Sudorifera, diaphoretica, humiditatem corporis ad *ὑπερβολήν*, diuretica, purgantia debiliora in matulam profundentia, alvum exiccant; hypnotica, narcotica, expultricem sopiunt: nimius quin & purgantium usus, præter id, quod lubricitatem intestinorum tollat, intestina sui hinc oblita muneris segnescere facit, secundum *Bernhard. Swalve disquis. therapeut. gener. f. 2.* Motus immoderatio, equitatio & vectio in curru velocior secundum *Sennertum l. 3. prax. p. 2. f. 3. c. 4.* in culpa sunt, ut & itinera sub sole calidiore facta, longiora exercitia alia, unde humidum aliò vocatur, sensibilibus aut insensibilibus dissipatur, excrementa suspendunt; ita ob insensilem transpirationem nimiam alvus vix intra octiduum, idque parum, excrevit,



crevit, *ephem. naturæ curiosorum ad annum 72. obs. 46.* Otium ut in genere mali omnis origo est, rectèque Satanæ in moralibus pulvinar dicitur, ita *Senecâ* teste, ad hoc iners vergit valetudo, atque huic quoque morbo fomentum præbet; languescit enim sub hoc tantum non omnis corporis vigor, sed & in specie expultrix vis remittit, humoresque viscosi, pituitosi cumulantur p. n., de quibus post. Huic præcipuè causæ frequens hoc & quasi proprium symptoma Literati & vitâ sedenteria gaudentes debent. Somnus & vigiliæ si modum excedunt, pari cum prioribus passu ambulant, alvum impediendo, utque feces tardius descendant, procurando. Excrementa ipsa sibi obicem ponunt, si in specie ventriculi & intestinorum reliquæ inutiles debitò per inferiora tempore non exeunt, sed intestina infarciunt; ita ob neglectam quidam fecum depositionem in itinere miraculosam alvi adstrictionem incurrit, apud *Salmuthum c. 3. obs. med. 45.* Si pituita intestinalis plus justò aucta, inspissata, vias obstruit, inviscat, quod fatum *Lipsii* fuisse in vita *Heurnii* legitur, ubi evacuata post materia intestinum ejectum mentita fuit; similèque quid aliis evenisse *Fernelius l. 6. de part. morb. & symptom. c. 9.* testis est. Si viscida sensum obtundit, si bilis, hepatis excrementum, non influat sufficienter, alvinarum scoriarum non modò sequestrationem non juvat, sed & felicem, promptamque secessionem, non abstergendo, non diluendo, non stimulando, impedit. Si humor pancreaticus debitam sui miscelam denegat, acidior, quasi convulsione tunicarum interiorum, retractione ad superiora factâ, motum peristalticum ordinarium invertit, unde ad os subinde redeunt excrementa, quo de casu legi *Job. Drawizius meretur de sympt. scorb. c. 8.* Si flatus naturales, qui secundum *Glissonium l. c. c. 24. & seq.* intestina à flacciditate vindicant, motum eorundem peristalticum distributivum exercent atque vigorant, fibras tunicarum ad expulsionem stimulant &c. non adsunt; adde *Helmontium de flat. n. 37. & 39.* Mistionem sive Venerem, quæ in ventre sunt, indurare *Hippocrates author est, 6. epid. l. c.* Animi pathemata ut in totum sibi corpus ejusque actiones jus sumunt & potestatem, ita & alvum sistere posse, per exempla & rationes eunti, nec dictu, nec probatu, difficile erit. Igitur hoc supersedeo labore & ad *Causas* p. n. quæ restant, transeo.



VII. *Hæc* tantum non omnium viscerum partiumq; dispositiones p. n. suggerunt; potiores brevitatis amore tangam. Ventriculus, siue calidior sit, & corrumpat cibos in nidorulentum quid siccumque, siue frigidus & non debito tempore, non feliciter, finiat coctionem suam, egestionem alvi impedit, iudicio C. Hoffmanni l. c. Pylorus obstructus apud Hildanum l. c. scirrhusus apud Phil. Salmuthum, c. 1. obs. med. 20. transitum in intestina prohibet. Ipsorum intestinorum intemperies calida & sicca feces exiccat; frigida & humida fibras, ne contrahantur, laxat, tumores inflammatorii alique vias intercipiunt, obstruunt calculi, vermes, pituita viscida, materia nigra, instar terebinthinæ tenax, quam non, nisi febriculâ comite, mulier quædam excernere potuit, apud Th. Bartholinum c. 4. Histor. Anat. 40. quælibet corpora solida alia intra intestinalem fistulam subsistentia idem patrant; exemplo fuerunt aurei nummi deglutiti apud eundem c. 3. epist. med. 69. nuclei cerasorum & prunorum trium plus minusve librarum pondus æquantes apud J. Nicolaum Binningerum c. 2. obs. 20. plumæ, lapilli, filum & stramen ab infante excreta apud Fabr. Hildanum c. 3. obs. chir. 75. Spongiam compressam & deglutitam imbibitâ humiditate hære in transitu & suffocare Glissonius scribit. Excrecentia carnea instar renis vervecis biennalis causam obstructionis præbuit, ephem. nat. curios. ad ann. 6. & 7. obs. 97. Substantia membranæ jejuni in cartilagineam indurata apud Ballonium 1. epid. ad ann. 15. 24. ileum nodosum, contortum, ob motum peristalticum variâ fibrarum flexione impeditum, difficilem alvum fecerunt ephem. nat. curios. ad ann. 1. obs. 126. malumque hoc ab ipsâ statim conformatione accidisse, & frequentius fortè hodiernum fieri, quàm observatur, Author l. c. suspicatur. Illapsus intestinorum, ubi vel pars inferior superioris in se portionem haurit & absorbet, vel secundum Sylvium inferior subit superiorem l. c. (casum utrumque Gerhardus Blasius obs. med. p. 3. l. 3. vidit), obicem ponere potest; ubique enim contentis transitus præcluditur. vide Panarolum pentec. 1. obs. med. ult. Th. Bartholinum c. 4. epist. med. 93. & hoc quidem Glissonius frequentius, in ileo, rarius Warthonus in colo factum observavit. Hôcque positò eò minus de convoluto hoc ipso intestino, quin idem patrare

B

possit,



possit, cum *Francisc. de le Boe Sylvio l. 1. prax. c. 15.* dubitandum; vidit hoc septem diversis in locis ita convolutum, ut cibis, potui & fecibus, omnem denegarit transitum *P. Barbette in prax. l. 4. c. 7. obs. 2.* deprehensam eandem *Magnificus Dominus Præses* in Gymnasio Patavino novit, & his & pluribus oculatis testibus *E. Riverius accedit prax. l. 5. c. 2.* Intestinorum vulneratio aut ruptio, quæ colo accidit apud *Benningerum l. c.* coërcuit alvum, per umbilicum excrementis ejectis in *ephem. nat. curios. ad ann. 3. obs. 64.* ex inguine dextro propter herniam exulcerato *ibidem obs. 122.* in abdominis cavum effusis apud *Riverium c. 3. observ. Med. 26.* Asperitas & corrugatio interioris tunicæ fecum descensui, etiam liquidarum, ad secundum vel tertium diem resistit secundum *Glissonium l. c.* Hernia intestinalis, umbilicalis, gangrænâ non rarò & morte ipsâ sequentibus, obstructionis causa fit: scirrhus, ulcus cancrum cœci malum peperit apud *F. Hildanum c. 1. obs. chir. 61.* Flatuum p. n. retentio secundum potissimos subinde obstaculo est, ut nec egredi quicquam è ventre, nec ingredi possit; verisimilius tamen hîc quasi convulsionem intestinorum seu contractionem parietum superiora versùs fieri autumo, quam ipsa prodere cura causam videtur, quæ humectantibus & relaxantibus illam intestinorum retractionem feliciter perficitur, vid. *Job. Drawizius l. c. c. 8.* In ano ipso sæpe impedimentum est, si stercora hîc cumulantur & indurantur; exemplum *Panarolus* reliquit *pentec. 3. obs. 28.* si vasorum hæmorrhoidalium tumor, condylomata viam obsident: si ulcus hîc nascitur *ephem. nat. curios. ad ann. 2. obs. 77.*, si coalescit secundum utraque latera ex *Marcello Donato l. 4. Hist. med. mirab. c. 10.* quod post dysenteriam factum notavit *J. Rhodius c. 2. obs. med. 82.* si obstruitur à re extrinsecus immissa; sic à cauda porcinâ meretrici in anum intrusa apud *Petrum de Marchettis obs. chir. de fistul. ani & intest. recti obs. singulari ult.* alvus integrum sextiduum suppressa fuit; si planè clausus & imperforatus est, cujus exempla hinc inde petere potes. Ani stupor, paralyxis, nimia refrigeratio, vis narcotica, nervorum resolutio, sensum tollunt, animalem spiritum subtrahunt; qua ex causa posteriori in nobili virgine excretiones omnes ad plures annos abolitas *Gn. Ander-*



*nacis comm. med. vet. dialog. 8.* memorat. In eundem effectum tumores aliaque vitia partium vicinarum, mesenterii, hepatis, pancreatis, lienis, renum, uteri, vesicæ, abdominis, conspirant, comprimendo, alterando, bilis aut pancreatici humoris influxum impediendo &c. Læsi peritonæi alvi contumaces obstructions oriri, coccyge intortâ feces morari *Theodor. Schenckius exerc. Anat. 4. l. 1. f. 2. c. 12.* author est. Musculi abdominis undecunque læsi subsidium, quod debent, non afferunt, mens ipsa laborans in deliriis molestiam non curat, non animadvertit. Variolæ materiam ad cutim, catarrhi ad nares, salivatio ad palatum vocantes, aberrationis à via ordinaria causæ existunt: vasorum denique lacteorum p. n. rapacitas à *Glissonio* quoque in jus trahitur.

VIII. Transeo ad *Signa*, quorum nonnulla *affectum* ipsum, nonnulla *causas* produnt, nonnulla *futura* præfagiunt. Quà priora multum laborandum non est, malum enim ipsis sensibus patet, ægrorumque hoc querelæ satis superque manifestant. Causas autem ut noris, harumque varietatem distinguas, in curationis præsertim puncto, maximi res momenti est; quî enim auferes, quod ignoras? quî curabis, quod nescis? De externis, an scil. aër, cibus aut potus, ingesta alia, an motus corporis aut animi, similiaque iuculpari possint, æger & adstantes Medicum monebunt; internæ σοχασµᾶ Medici accuratiori opus habent. Ventriculi intemperiem & intestinorum propria manifestabunt symptomata, indigestam crudam multam in ventriculo materiam crassum plerumque & viscidum sputum, post sumtum cibum ructus, compressio thoracis, spirandi difficultas ostendunt: pylorum occlusum materię comestæ jugis per vomitum rejectio, inflammationem intestinorum dolor ingens, fixus, distendens; febris &c. produnt, tumor subinde manu tactuque palpari potest, ex *6. de loc. aff. 2.* Feces induratas assumpta exiccantia, potus intermissus, suspectas reddunt, intestina loco mota & quocunque prolapsa, sensus observant. Lacteorum rapacitas, excrementa sicciora, duriora, in forma pilularum, stercoreis caprini instar, relinquit. Intestinorum illapsus, convolutio, contorsio, non nisi post obitum patent. Intestinum rectum afflictum sedes doloris, frequens deijciendi cupiditas ex *Rod. à Fonseca t. 2. consult.*



*sult. med. 90.* ostendunt. Anus clausus tactu & visu judicatur; pituita tenacem & p. n. cumulatam cruditas precedens multa, flatu plurimi, murmura familiaria, ventris frigus patefaciunt: bilis impeditum influxum icterus accusat, humiditates alias aliò raptas sudores multi, nimia *Ἀφύεσις*, *διέρεσις*, salivatio, variolæ, catarrhi monstrant; viscerum vicinorum intemperiem calidam caloris p. n. in affecto loco sensus, subinde etiam *φλόγωση* in facie detegunt; stuporem, sensum abolitum, nervorum resolutionem, animalium spirituum defectum, paralysis, apoplexia, venter &c. indicant: ubi calculi vel vermes in culpa sunt, propriis se signis revelant.

I X. Quà *Prognostica*, utut non rari visi sint, qui alvum constipatam quasi naturalem & innoxiam circumferunt, qualis fuit, qui semel solùm per integram septimanam, & quidem die semper Jovis exoneravit ventrem apud *Phil. Salmuth. c. 2. obs. med. 65.* alii secundâ, tertiâ, quartâ septimanâ apud *Job. Rhodium c. 2. obs. med. 81. Ephem. nat. curios. ad ann. 73. obs. 265.* tertiô vel quartô mense apud *Panarolum pentec. 1. obs. med. 1.* Integram post biennium apud *Welschium obs. med. Rümmler. 68.* deposuere: plerumque tamen *ex cit. l. 6. epid. f. 3. t. 1.* res malè cedit, indeque obrutô capite dolor, vertigo, fiunt apud *Schenckium l. 1. obs. med. p. m. 163.*, memoriæ debilitas apud *Th. Mermannum l. 3. consult. med. 25.* appetitus, coctio, læduntur, vomitus, colica, ileum malum oriuntur, febres surgunt teste *Bartholino c. 6. obs. 38.* catarrhi apud *Schneid. l. 4. de catarrh. f. 1. c. 4.* corporis totius lassitudo, refrigeratio quasi morientis, lipothymia, sequuntur; æger prorsus mutatus, macilentus, pallidus, facie cadaverosa, totus foetidus factus fuit, apud *Panarol. pentec. 3. observ. 28.* epilepsiæ, in pueris præsertim. prodromus est apud *L. River. obs. com. à D. Petro Pacheco 50.* sanguinis vanus conatus è naribus stillicidium, lacrymarum ex oculis fluxum, ani, uteri, sed imperitis, procidentiam, veriùs membranæ pudendi extensionem, secundùm *Barbette chir. c. 8.* minatur, apoplexiæ metum apud *Salmuth cent. 2. obs. 65.* facit, imò mortem ipsam apud *Rhodium c. 2. obs. 77. Panarolum pentec. 3. obs. 29. River. obs. comm. à Jac. Formio 18.* infert. Potissimum autem malè ominari debemus, si  
ab



ab inflammatione intestinorum dependet, quæ plerumque lethalis; si à contortis, convolutis, nodosis, illapsis intestinis, si ab hernia incarcerata, à coalitu laterum intestinorum, res fere desperata habenda. Si tamen in illapsu pars intestini inferior subit superiorem, curationis spes superest secundum *Sylv. loc. c.* In paralyti, veterno, apoplexia, miserimus itidem ægri status est; Si anus clausus secundum totum musculum coaluit, incurabile; contra, si membrana tantum obducta est in exterioribus, intestinorum quasi convulsio multum non raro etiam negotii facessit; obstructio à fecibus ut plurimum non ita difficulter curatur, si tamen stercora nimis indurata, quasi incuneata sunt, præsertim in tenuibus, quod accidit Patri Cappucino apud *Panarol. l. c. pen- tec. 3. obs 29.* in omnibus intestinis, quæ referta instar sanguicolorum in inspectione comparuere apud *River. in obs. Form. comm. 18.* mortis non raro causa fiunt; pituita viscidior totum colon obducens apud *Salmuth. c. 1. obs. 78.* verè gypsea idem infarciens, ut solidum totum videretur, apud *Fernel. 6. de part. morb. & sympt. c. 9.* omnibus fecibus suppressis enecuit. Feliciorum fortunam mitiores causæ spondent. Ætati quod debetur malum, ætate solvitur ex 2. aphor. 20.

X. Quæ Curationem, omnis illa in causarum ablatione consistit, quæ ut variæ sunt, ita varia etiam remedia postulant; intemperiei nimirum corrigendæ alterantia debita præscribenda, feces induratae emolliendæ, lubricandæ, referandæ viæ, expultrix stimulanda, obstacula omnia removenda, pituita crassa, viscida incidenda, abstergenda, bilis & pancreaticus humor in viam reducenda, naturalis horum effervescencia promovenda, motus intestinorum peristalticus juvandus, situs restituendus, partium aliarum peccantium ratio pariter habenda. Auxilia in quamcunque parata partem ex consuetis fontibus, chirurgico, pharmaceutico, dietetico petenda.

XI. Querere autem non abs re est: an etiam hîc quid subsidii Chirurgia subministret? Venæ sectio generosissimum alioquin remedium audit in gravissimis morbis, quod sæpe unicum faucibus ægrum mortis subducit; quam & hoc loco probo, si ab intemperie calida, forti inflammatione sive intestinorum sive



viscerum vicinorum, malum dependet: *Alex. Trallianus* alvi & urinæ excretionem ita sæpe promovit *l. c. de colic. dolore ex intest. inflamm.* ita *Balthasar Timæus* in alvi constipatione à lienis intemperie nata venæ sectione usus fuit. *l. 3. cas. medic. 14.* post hanc sanguisugas hæmorrhoidalibus apponendas in juvene melancholiâ hypochondriacâ laborante, pro calore interno ventilando, *Th. Mermannus l. 3. consult. med. 25.* suavit. In ano clauso omnis in chirurgia curationis spes sedet, qui sectione secundum rectitudinem, ubi vestigium viæ apparet, aperiendus, si membrana crassior & robustior intercedit; si tenuior & mollior, perruptioni digiti sufficiunt subinde, secundum *Paulum*, utut *Aquapendenti* operatio hæc non omnino placeat, *de oper. chir.* post cannulâ plumbeâ aut argenteâ medicamento desiccantē, de ceruss. minio, diapomphol. inunctâ & immisâ, ne iterum coalescat vulnus, impediendum; casum & integram curationem *Guilhelmus Fabritius cent. 1. obs. chir. 73.* suggerit. Si totus musculus coaluit, & vestigium ani nullum adest, malum incuratum relinquit *Aquapendens* ob metum vulnerationis musculi, aut fortè secuturum involuntarium fecum exitum *l. c.* In intestini intus susceptione, mediis ordinariis nequicquam proficientibus, *Barbette chir. l. 4. c. 2. pr. l. 4. c. 3.* cucurbitulam magnam non scarificatam parti dolenti aut umbilico reiteratam appositam laudat: imò sectione musculorum abdominis & peritonæi factâ, digitis susceptum intestinum extrahi & ægrum forsitan salvari posse idem credit: quæ eadem in motu intestinorum inverso à contorsione, involutione &c. si tentanda sunt, locum haberent. Huc refero, quod monstro ferè simile est, verbera in obstructione alvi prodesse; ita enim de his *Th. Campanella l. 3. med. c. 5. art. 12.* Princeps Venusiæ, scribit, musicâ clarissimus nostrô tempore, alvum deponere non poterat, nisi verberatus à servo ad id adscito; addit, posse hoc motui dari cogenti spiritus ad interiora; quam causam nunc non disputo: usum tamen verberum in Medicina, qui plenius nosse cupit, *Th. Bartholinum & Job. Henricum Meibomium de flag. usu. in re med. & vener. evolvat.* Ad præsens *Rolfinccius* negotium formulam jocosè sequentem ordinat: *& flagrorum vel virgarum paria duo impingantur alternatim lumbis & natibus; solvetur alvus.*



Chirurgiæ nonnulli infusoriæ, multum etiam tribuunt, quâ laxans venæ materia infunditur, vid. *Phil. Jac. Sacbfus ocean. macro-microcosm. §. 155.*

XII. Reliqua spes in *Pharmacia & Diata* posita est, quarum illa medicamenta omnis generis interiora per os & anum offerenda, & exteriora variis applicanda locis subministrat. Notandum tamen in genere & præcipuè circa interiora, *δρασινῆς* periculosis leniora semper præferenda; præclusio enim inferiori gutture dubio procul vano cum successu omnia violentius propulsa per superiora redibunt. In specie autem ad emollitionem fecum, humectationem & lubricitatem, retractionem & quasi convulsionem corrigendam intestinorum, per os oleum oliv. recens, amygd. dulc. ex cerevisia calida, brodio seu jusculo carniū, cremore ptisanæ, it. manna Calabr. in jusculo, cassia & ol. amygd. dulc. vel decoct. prun. damasc. porrigi possunt. *Cardanus* mannam in aq. borraginis dissolvit, & per balneum Mariæ destillatum ab ℥j. ad ℥ij. propinat. lactis crem. & serum assumta jejuno ventre per os profunt, pruna laxantia, ficus pingues, passulæ laxat. rob. passulat. si præsertim sanguinis suspectus & viscerum calor est, species diaprun. confectio passulat. *Mynsicht.* elect. de tamarind. vinum passulatum laxativum *Timæi*, cremor tartari, hujusque tinctura cum jusculo sumta, pilulæ Angel. bened. *D. Spinæ*, de ammon. ejusd. *Francof.* laxat. *D. Haugii D. Glassii*, marocostin. piper album in prunis emollitis secundum *Cratonem in consil.* sui naturam officii admonent; horumque numerum tantum non innumerum promptuaria & hodegi Medicorum varii promunt. *Galenus* quinque caricas, in quarum unaquaq; sem. cartham. decortie gr. 3. vel 4. exhibet, ad leniendam alvum deprædicat. *Roder. à Fonseca* lac asininum c. sacch. ad libram sumtum jejuno ventre remedium singulare vocat *t. 2. cons. med. 90.* Per inferiora clysteres conveniunt, itidem magis emollientes, lubricantes, laxantes quàm acres, fortius stimulant; ex solo ol. communi olivar. lin. butyro & lacte, mucilagine seminis lini, ficuum, malvæ, althææ, butyr rec. crem. hord. ad mucilaginem & lentorem cocti cum unguent. clysmatico fieri possunt: commodè lac solum tepidum cum melle injectum, aut ol. amygd. dulc. q. s. mixtum clysteris loco



loco esse potest; locô ol. amygd. substituitur chamomelinum liliaceum vel commune. Quod si acrioribus interdum opus est pro intestinali glutine abstergendo, adsumi potest el. hier. picr. c. agar. Nicol. Logad. bened. laxat. ol. rutac. diacolocynth. &c. clyster ex croco metallorum, filtratô tamen decoctô, multum prodest: ubique tamen aures vellicet illud, ne quid nimis; ne quotidiana in consuetudinem abeant, aut his assuescat natura, nec, nisi clystere vel alio sollicitata, suum ad officium redeat. Notandum insuper gravidis nec clysteres, nec pilulas, præsertim aloeticas, satis congruere, sed diætam fere sufficere alvum emollientem, pruna momento cinamomi conspersa & in aqua cocta, nec non mannæ ꝑ℞ vel ꝑj. dulcorata interdum & horum similia, quibus de circa *diætam*. Urgente tamen necessitate clystma ex lacte, saccharo, butyro, aut ex brodio carnis, saccharo aut oleo communi, addito pauco sale *Th. Mermannus l. 3. consult. 26.* concedit.

XIII. *Suppositoria* succedanea esse possunt, eaque vel ex lardo solo formata, oleô aut butyrô illita; globulus saccharatus moschatus, sebum hircinum, ficus inversa, & oleô olivarum inuncta & similia in infantibus huic officio satisfaciunt. In adultioribus ex melle ad duritiem cocto, salis tantillo, imò etiam speciebus aliis additis, extruuntur. Ex alumine pulveris. tragac. & aq. ros. *Angelus Sala* satis efficacia parat. Aliô planè inusitatô, ligneô cochleari majusculô violenter intrusô, alvum pertinacissimam solvit *Baro* quidam *Silesius ephem. nat. curios. ad ann. 1. obs. 98.* Ligneum suppositorium tale jam antè etiam expertus fuit quidam apud *Salmuth. c. 3. obs. 47.* substituit alius digitum immissum juvenis apud *Panarol. pentec. 3. obs. 28.* In casu desperato, ubi duro nodo durus quærendus erat cuneus, ne quicquam hîc solutivis, sive per os, sive per anum adhibitis, proficientibus, vomitorium ex tart. emet. gr. 6. in aq. pingui non salita datum, adjectô simul suppositoriô, alvus ἀνω καὶ κατω soluta fuit, *ephem. nat. curios. ad ann. 3. obs. 26.* Eadem *Rodericus à Fonseca* admittit in robustis *t. 2. obs. med. 90.* ipseque *Cons l. 2. deviâ. ratione* commendat, si ob errores externos in diætâ commissos, vel naturalem ventriculi imbecillitatem viscidum & pituitosum congestû fuerit.



XIV. *Helmontius* in ileo, stercore durô, quod contra vulgarem, imò *αυτοψία* ipsam, statuit, intestinum obstruente, neminem, ut jactat, perire sivit, sed potandos globulos plumbeos musquetarum, ut sui solùm pondere excrementum propellerent, dedit: quò enim plures, scribit, hauriuntur & majores, eò tutior & celerior sequitur sanatio; interea æger stet, ambulet vel velut ducatur erectô abdomine; quod etiam in convolutione & illapsu, præsertim parte intestini inferiori subeunte superiorem, secundum *Sylvium*, { qui plumbeas & aureas hunc in finem pilulas commendat, ut *Henricus ab Heer* etiam argenteas } spem curationis reliquam facit *l. c.* Alii ex regulo antimonii aliquoties fuso globulos similes formant, alii chalybem deglutiendum propinant. Argentum vivum ad  $\text{℥ij}$ . imò ad  $\text{℥b. iij}$ . *Paræus* exhibitum refert, eidemque palmam præ reliquis omnibus concedit, innoxiumque sumtum *Henricus ab Heer obs. med. opp. rar. 2.* confirmat. Mortuus tamen nonnemo post propinatum hoc Patavii fuit, rupto ileo in fine sui ad palmæ longitudinem, ut ex ore *Magnifici Domini Præsidis* habeo. Anceps ergo eventus est, & tantùm desperatis, consuetis non juvantibus, à Medicis, quorum autoritas facta tecta est, exhibeantur, secundùm *ephem. nat. curios. ad ann. 3. obs. 315.* Subinde tamen audaces fortuna juvat. In malo aliàs conclamato nonnulli ad follem *Hippocratis* ex *3. de morb.* aëre calidiori imprægnatum confugere jubent, qui intestina dilatando obstructionem solvat. Hunc quidem *Petrus Salius Diversus* nec se nec alios felicem expertos esse scribit, præter unicum *Amatum Lufitanum*, qui, ut addit, si ei credendum, semel hac curandi ratione felici cum successu usus est; *Epiphanius Ferdinandus* tamen *Joh. Altimari* Medici celebris filium hòc modò ad miraculum usque mortis è faucibus retractum memorat *hist. 74.* modumque applicandi *Alex. Trallianus lib. 10. de colic.* monstrat, sed in inflammatione rejicit. Tussis, sternutatio, vehementiores motus alii, non rarò etiam auxilio sunt, experimentò *F. Plateri l. 1. obs.* pari ferè modò, quo *Cous* partum difficilem sternutatione promoveri afferit *5. aph. 35.* Si malum ab aliis causis partibusque dependet, ipsis his debità remotis, partibus in integrum restitutis, curabitur & illud. Prolixè autem huc omnia & singula adducere ob pa-



gellarum angustiam nec libet, nec licet: in specie *Tb. Mermannus* condylomatum curam sistit *l. 3. consult. 31. Bilis & pancreatici humoris correctio ex Sylvio* peti potest. *F. Hildanus* cum pluribus constipationem ab acidulis curandam docet *de acid. Grisebac.* De cæteris Practicorum volumina passim obvia consulantur.

XV. *Externorum* verò dememinisse non oportet, qualia sunt in seffus, fomenta, epithemata, unguenta, linimenta, olea, aquæ &c. quæ abdominis variis partibus, plantis pedum, volis manuum, naribus, oculorum angulis admota profunt. Illa ex emollientibus, malv. alth. beta &c. chamom. melil. branca ursina, pariet. sem. lini, mucilaginosi variis confiunt, ut vel æger immittatur, vel abdomini applicentur. Umbilico unguentum clysmaticum, de alth. ol. lin. cum stuppa cannabin. pingui. anser. unguentum de arthenit. emolliens & laxans *Timxi*, ex malva in butyro frixa & fortiter expressa *Solenandri*, imponendum. Præsemina unguium manuum & pedum nodulo inclusa & alligata umbilico, sed ad conatûs sensum, aut secundum alios, post unam horam, ob metum vehementioris fluxus removenda *Jonstonius* commendat, idemque ex aliorum ore *Schröderus lib. 5. pharmac. medic. chym. class. 1. n. 23. Rolfinc. meth. medic. spec. comment. l. 5. f. 7. c. 14.* referunt, ipsasque hydropicorum aquas exantlare creduntur. Vires alii antimoniales, alii ciclaminares & colocynthiacas, imò venenatas prorsus inculant, vid. *Beckerum in microscop. Rolfinc. l. c. l. 5. f. 8. c. 1.* Utut sit, intus præbitam horum rasuram, vel in minima quantitate, *ἀνω καὶ κάτω* movisse, etiam antimonio & hellebori extracto incassum datis, *Henricus ab Heer ἀντιπυλῆς* testis est *obs. cit. 29.* idemque complures alii experti perhibent Roberti: sordida tamen hæc sunt *Danieli Ludovici*, Medicastro-  
rum negotiationibus quàm comptæ medicorum praxi aptiora, *de pharmac. modern. secul. applic. dissert. 1. de purg. vom.* Tileman-  
nus ani orificio sequens applicandum præscripsit: *℞. fell. tauri, salis gemm. aloës, ol. comm. anaticâ* proportionem, *f. ung. de mat. medic.* Stercora sterco propellere dicuntur, unde bovinum aut efficacius caprillum abdomini admoventur teste *Frid. Hoffmanno in m.m. Wal. l. 1. c. 19.* Aqua aloëtica, sol. *Myns* ventriculo inungitur. Abbatissa quædam quotiescunque purgari volebat, compres-  
sas



fas pilulas una ex parte madefactas ventriculo apposuit, suoque ita desiderio satisfecit, authore *Fallopio de purg. c. 2.* Similem pilularum massam Medicus quidam matronæ delicatæ valdè & medicamentorum per os sumtionem omnium respuenti plantæ pedis supposuit, ut purgaretur per alvum apud *Höferum in Herc. Med. l. 3. c. 5.* Aloë & Colocynthis manibus detenta ventrem solvunt, ex *Natb. Highmoro corporis hum. disquis. Anat. l. 2. part. 2. c. 6.* naribus alia admota apud *Salmuth. obs. 8. 14. Panarola pentec. 4. obs. 28. Binningerum c. 2. obs. 86.* oculis instillata: ita empiricus famosissimus *Mart. Rulandus* aquam possedisse fertur, quâ majori oculi cantho illitâ aut instillatâ alvum sollicitare novit; rationem *Rolfinccius* inquirat *dissert. Anat. l. 2. c. 25.* sed de his abundè satis.

XVI. Superfunt auxilia è fonte *Dietetico* scaturientia. Aëris autem hîc subsidium non planè nullum est, sed ut calidus & siccus exiccat, ita frigidus & humidus sine dubio humectat alvumque fluidam facit. Egregium hujus experimentum *Michael Savanarola* in Borsio Ferrariensium Duce vidit, cui, aliis nihil proficientibus, inambulationem nudis pedibus per pavimentum marmoreum frigidâ aspersum suavit, alvumque aperuit, *Brassavolô* teste, *de medic. purgant.* idemque didicisse jam dudum ab experientia rusticos scribit *Hieronymus Thriverus comm. l. 2. aph. 20.* si nudis pedibus obambulant ventrem pertinacem solvi, nec exemplô caret; ventre enim frigori in nonnullis expositô, idem fieri, nemo non novit. Consensum pedum cum intestinis *Sennebertus* advocat, quem diversi diversè explicant: sanguinis circulus rem facilè expedit. Alias ad pororum cutaneorum à frigore constrictionem alvi fluor sequitur secundùm *Willisium in rat. pharm. de purgat. 5. 6. cap. 6.* tantùm enim ad alvum lubricandam addi scribit, quantum *Αλγνοῦ* solitæ adimitur. Cibus & potus sæpe unicum remedium sunt, laudaturque panis à furfuribus non omninò liber; hic enim illô, qui ex sincera natus farina est, ducendæ alvo aptior, elixa assis præferenda, butyrum recens, olera, cæteris paribus, ad emollitionem accommoda; v. g. malva, lactuca, spinachia, brassica, atriplex, beta leniter elixa: cremor hordei ad mucilaginem cocti; ex fructibus

C 2

cerasa



cerafa dulcia, fraga, poma dulcia, armeniaca, perſica benè matura; pulmenta ex uvis paſſis, ova recentia ſorbilia, carnes vitulinae, agninae &c. proſunt; fugienda verò adſtringentia quaecunque, cydonia, aliaque hujus ordinis ſtyptica quòcunque etiam tempore ſumpta; in fine enim menſae admiſſa alvum ducere nec ratione conſtat nec experientiâ, ut *Tb. Mermannus l. 3. conſult. 31.* verè conſitetur. Potus etiam cibis conveniens ſit, præſtatque hîc potius in exceſſu quàm defectu peccare; Acidulae multum Martis habentes alvum præ aliis cient. Conſert matutina, ante & poſt menſam, moderata ambulatio: unde prudentiores non à ſomnò ſtatim publicis ſe negotiis exponunt, ſed corpus motitando, ventilando, prius ad excrementorum exonerationem invitant. Vigiliæ & ſomnus excedentes abſint; novi, inquit *Williſius*, plures ventris conſtipationi obnoxios hîc tantùm remedii genere curatos, quod horâ prius aſſuetâ citius ſurgerent. Juvat alvum ad ſtimulum perceptum præſtita naturæ obedientia, imo ubi etiam ſtimulus non eſt, manè & vèſperi ad locum convenientem ſecedendo naturam excitare & irritare ad officium ſuum, quàm maximè prodeſt. Tandem animi affectus, curæ graviores, mœ-  
 rores & ſimiles exulent; corporis enim humiditates, vires  
 omnes, imò vitam ipſam, teſte *S. Codice*,  
 furantur.

**Tantum**

**DEO TRIUNI SIT LAUS ET GLORIA.**



## I.

Sunt ingesta bene hæc, bene sunt digesta, per Artem  
Quæ Müllere bene hîc egeris: euge vales!

*Congratul. s.*

PRÆSES.

## I I.

*Ad Clarissimum Dominum Candidatum*

MÜLLERUM, De obstructâ alvo  
*disputantem.*

Miror, ab obstructâ specimen cur sumpseris alvo.  
*Doctrinæ, tibi cùm cætera cuncta fluant.*

*Forſitan ut monſtres, aliis quæ obstructa putantur,  
Cuncta quòd ingenio ſint adaperta tuo.*

*Ita gratulabundus ominatur*

TOBIAS WAGNER, D. Cancellarius.

## I I I.

Dum paſſim, è rigidâ Martis, Mortisque ſemente  
Morborum exurgit pernicioſa ſeges:

Promptus ades Müllere, manuque, & voce paratus,

Haud poſtremam affers, quæ medeatur, opem

Larga ſubest meſſis! Piſtrinam age diſcute; felix

Auguror, ex meſſe hâc Te *molitura* manet.

LUDWIG GOTTLIEB BREUNING,

Jun. Ph. & Med. D. Phyſ. Stuttg.

## I V.

Affurget Medicus tandem!

Sonnet.

Der Arabs, deme ſonſt/ die Merkte viel zu dancken.

Als der in ſeiner Sprach/ viel heilsames Entdeckt/

Hat doch denſelben auch/ ein harten Dorn geſteckt/

In



In dem Er Sie einschleußt/ in Ewige Todes-Schranken/  
 Sie werden nicht Erstehn; Schreibt Er/ ganz ohne Wanken \*  
 Wer ist/ den dieser Text von Aerzten/ nicht erschrockt!  
 Daß der nicht sollt Erstehn/ der andre auferweckt  
 Macht ein betrübtes Herz/ und seltsame Gedanken.  
 Euch Herz Licentiat, hat mancher schon versehn.  
 Auch unter diese Aerzt/ so nimmer auferstehn;  
 In dem Ihr was verweilt. Nun siht man Euch doch leben/  
 Und öffentlich aufstehn! Gott schaff Hülff und Verstand  
 Daß Ihr recht wol besteht; und Eur Erfahrne Hand  
 Müß' andren mit der Zeit/ das Auferstehen geben.

\* Legit Arabs pro Rephaim mortui, Rophaim Medici, hinc  
 nata *παρεγερνεία* duobus in locis Psalm. scil. LXXXVIII.  
 v. II. Et Esaïæ. c. XXVI. v. 16. utrobique enim est Me-  
 dici non resurgent. Vulgatus quoque in Psal. cit. nomen  
 Medici minori tamen cum contumelia retinuit; inde Me-  
 dici, prout vulgo canitur, in hunc Psalmum introducti  
 sunt. vid. Hotting. Dissertat. de Resurrect. num. XXII.  
 p. m. 35. 36. Sixtin. Amama Antibarb. Bibl. p. m. 524.  
 ubi dura & dira in Medicos à Judæis prolata invenies,  
 diluta tamen.

Welches Eilfertigst aus Treuverbundenem  
 wolmennendem Herzen  
 gratulirend wünschet

M. GUSTAV-ADOLPH Jung/ August.  
 Hoch-Gräfl. Hohenloe-Neuensteinischer  
 Statt- Pfarrer daselbst.

## V.

**I**Te mali, varioque truces certamine morbi,  
 MÜLLERUS Vobis incipit esse gravis!

In gratiam Amici sui  
 Disputando inaugurale decus capefferis  
 Gratulabundo animo  
 talia cecinit

M. TOBIAS MÆRCKLIN, p. t.  
 Colleg. Martin. Oecon.

F I N I S.